

Itoizko urtegia

Arrazoizkoa lanak gelditzea dela
iritzi dio Itoizko Koordinakundeak

IRUNEA

Itoizko Koordinakundeak urtegiko lanak berehala bertan behera utzi behar direla adierazi zuen atzo, Espainiako Entzutegi Nazionalak egungo proiektuaren tramitazio administratiboa legez kanpokoa dela dioen epaiaren berri izan ondoren. Koordinakundeak gaurko deitu duen prentsurrekoan emango du ofizialki epaiari buruzko erreakzioaren berri. Mari Jose Beaumont bozeramaileak, dena den, atzo aurreratu zuen urtegiaren kontrako koordinakundeak Entzutegiaren erabakiaren gainean duen iritzia.

Bozeramailearen aburuz, epaiak argi eta garbi erakutsi du orain artean Koordinakundeak defenditu dituen planteamenduak zuzenak izan direla. Urtegiaren kontrako taldearen arabera, Itoizko lanen kontra aritu direnei eman die arrazoiak Entzutegi Nazionalako magistratuek hartutako erabakiak.

Artean sententzia zuzenean ezagutzen ez zuen arren, atzo komunikabideek zabaldutako berriak kontuan hartuta epaiaren esanahiaz ere mintzatu zen Beaumont. Haren arabera, «juri-dikoki Itoiz existitzen ez» dela esan liteke, eta hortaz, urtegiko «lanak berehala geldiarazi behar» direla azpimarratu zuen.

Espainiako Herrilan Ministe-



Mari Jose Beaumont. JOXE LACALLE

rioak jada iragarri du sententziaren aurka errekutsoa aurkeztuko duela aurki. Beaumontek ildo horretan atzo gaineratu zuenez, errekutso hori atzera botatzen badute, Koordinakundeak eskatuko ditu Itoizko urtegiko lanek eragin dituzten kalteen erantzukizunak: «Orduan aztertu beharko ditugu erantzukizun legalak, bai Itoiz ingurua lehen-goan uzteko eskariei buruzkoak eta baita urtegiak sortu dituen gastu ikaragarriei buruzkoak ere».

Goirienak dio EHUK euskarazko titulazio guztiak kalitatez ematea duela erronka

Unibertsitateak eszenario berria hasi duela esan zuen Legebiltzarrean

Juan Jose Goirienaren Justez, gaurgero EHUrentzat hasiko den «eszenario berrian» badira zenbait erronka eta horietako bat euskarazko titulazio guztiak kalitatez eskaintzea da. Halaber, EHUK «barruko inertzia asko geldiarazi» eta Administrazioak bere ekarria «arrazionaldu» duela esan zuen.

LUIS KARLOS GARCIA / GASTEIZ

Goiriena Legebiltzarreko Hezkuntza eta Kultura batzordean agertu zen atzo goizean, UAK eskatuta, baina ekitaldia egindakoa aztertu eta datorrenaz ohartarazteko aprobetxatu zuen, Parlamentutik agurtzeko erabil-tzeaz gainera.

Lau urte igarota, EHUK «sinesgarritasuna» irabazi duela esan zuen. Ildo horretan, errektorearen aburuz, «gestio eta kontrolaren kultura» areagotu da aldi berean «gastuan zorrotz» jokatzuz. Halaber, marko normatiboa sortu izana eta laster Lan Eskaintza Publikoari ekingo zaiola nabarmendu zuen «normalkuntza» giroa dela-eta, «nahiz eta oraindik ere badauden gatazkak eragin nahi dituzten talde txiki batzuk».

ANDER GILLENEA



EHUK sinesgarritasuna irabazi du Goirienaren ustez.

OLALDE

Goirienaren irudiko, egoera «zeharo» aldatu da, batez ere iragan ekainean Inaxio Oliveri sailburuarekin finantzaketa ituna izenpetu zenetik. Errektorea argi mintzatu eta datuez baliatu zen: Fernando Buesaren agintaldian EHUrentzako diruak % 13ko igoera izan zuen, eta Hezkuntzaren aurrekontuak % 25 egin zuen gora. Honi erantzun zion gero bozeramaile sozialistak Sailak jakin beharra daukala dirua nora doan aurrekontuak behar bezala hornitzeko.

Nolanahi ere, finantzaketari buruzko eztabaidak luze segitu zuen. Goirienaren arabera, 1991tik 1994ra bitarteko desfasa 4.100 milioi pezetakoa izan da, eta Oliverirekin lortu akor-

dioak datozen urteetarako ere diru horniketa ziurtatu duela informatu zuen. EHUKo buruak, IUK ez bezala, konbenioa defenditu zuen, «ez baitio kalteri egiten autonomia unibertsitarioari».

EUSKALDUN
KOPURUAREN
IGOERA

Lekukoa hartuko dionak aurre egin beharreko zenbait erronka aipatu zituen Goirienak eta euskalduntzea nagusietako bat dela uste du. Lau urteotan euskaraz ikasi nahi duten ikasleen kopurua 4.000tik 7.000ra igaro dela eta irakasle euskaldunena 400dik 600 baino gehiagora pasatu dela esan zuen ondoren, titulazio guztiak euskaraz eskaini bai baina kalitatez eman behar dela argudiatzeko.

Rontaldeko istripua berriz gerta daitekeela dio Eusko Jaurlaritzak

BARAKALDO

1994ko urriaren 21ean Rontaldeko enpresa kimikoan gertatutako istripua «berriz gerta daiteke» kutsadura atmosferikoa aztertzen duen Ingurugiro Saileko kidea den Patxo Uribarriren ustez.

Aipaturiko enpresan egin diren berrikuntzak, ez dira istripua gertatu zen produkzio fasean

egin (bigarreanean), Uribarrik azaldu duenez. Aldaketa guztiak produkzioaren lehen fasean egin dira. «Aurrerantzean, beraz, Rontalderen arazoak bigarren fase horretara mugatuko dira» Uribarriren ustez.

Istripua berriro gerta daitekeela aitortu arren, Rontalde ez dela lehen bezain arriskutsua uste du Uribarrik, berrikuntza ugari egin baitira.



Intsumisoen protesta

Frantzia Moruroan egiten ari den proba nuklearren kontrako protesta ekintzak egin zituzten atzo intsumisoek, Euskal Herriko zenbait lekutan. Argazkian Donostiako intsumisoek Credit Lyonnais banketxearen aurrean egin zuten ekintza ikus daiteke. Intsumisoek odola jaurtiki zuten banketxeko atarian, Frantziako Gobernuaren jarrera salatzeko.

BAT-BATEKO LOTERIA

ikusi makusi

LOTERIA INSTANTANEA

80

MILOITIK

GORA SARITAN BANATUAK

ETA BANATZEN JARRAITZEN DUGU